

ЖАРААХАЙНУУД

Зунай дулаахан үглөөгүүр Бүргэд Булад хоёр хажуулинуудаа баринхайнууд, Сагаан нуур тээшэ алхалба.

Нэгэшье үүлэгүй сэлмэг үдэр болоошье наа, томо загаһан баригданагүй. Булад гурба-дүрбэн жэжэ жараахайнуудые татан гаргаба. Бүргэд нэгэшье загаһа барижа ядаһандаа, нүхэртөө иигэжэ хэлэбэ:

— Булад, эдэ загаһан болоодүй жараахайнуудаа уһа руунь табия, тиигээд бултандань даабари үгэе.

— Хэлэ мэдэдэггүй амитадта ямар тиимэ даабари үгэхэ хүмши?

— Нэгэ иимэ даабари үгөөд туршя: нуураингаа оёорһоо томо загаһануудые наашань эльгээгты! – гэжэ.

Жараахайнууд уһатай шэл баанха сооһоо гаргагдажа, нуур соогоо орохотоёо сасуу һүүлээрээ уһа ялас гэтэр долгитуулан, гэдэргээшье харангүй гүнзэгы руугаа шургашабад.